

GRATIS
AWE
Mainta
e corant di Toko



PROME MINISTER MIKE EMAN RIBA PLAZA BETICO CROES

**“BETICO CROES A
ENTREGA SU BIDA PA SU
PAIS Y A HACI UN
DIFERENCIA GRANDI DEN
SU HISTORIA”**



Prome Minister Mike Eman riba Plaza Betico Croes

“Betico Croes a entrega su bida pa su pais y a haci un diferencia grandi den su historia”

E discurso di Prome Minister Mike Eman durante e ceremonia protocolar riba Plaza Libertador Betico Croes relaciona cu “Dia di Betico” tabata carga e mensahe di union. Prome Minister Eman a recorda con aña pasa despues di celebracion di 18 di Maart el a sinta basta largo den su oficina cu e yiu homber menor di Betico Croes y hunto nan a contempla como yiunan con transmiti n’e comunidad cu nos no ta bira mas contento ora tin disputa riba e leyenda cu nos tatanan a laga pa e pais aki. “Nos no ta wordo alegre na momento ora nos mira division den nos pais riba memoria di nos historia. Nos como yiunan ta wordo alegre ora nos mira union den nos pais”.

Prome Minister Mike Eman tabata e unico orador ayera tardi riba Plaza Libertador Betico Croes, dilanti di un grupo di hende, cu no tabata mucho grandi. Asina p.e.

por a mira ausencia di Minister Richard Visser, di Presidente di Parlamento, drs. Paul Croes y tambe varios otro miembro di Parlamento.

Prome Minister Eman a duna di conoce cu: “Mi ta hopi consciente cu mi presencia aki como Prome Minister ta pa duna un tributo na un persona cu a haci un diferencia enormemente grandi den historia di Aruba. Mi ta consciente tambe cu mi ta para aki como un persona cu ta vincula den e historia di Aruba”.

Eman a corda nos cu nos mester transmiti e sentido di orguyo den nos lidernan. N’esnan cu a sacrifica y a sirbi e pais aki a todo costo.

“Aruba ta bendiciona di tabatin lidernan manera Betico Croes cu a pone tur cos un banda, su carera, su talento pa di dia y anochi sirbi un causa y sirbi un pais. Aruba tin hopi ehempel di lidernan po-

litico grandi cu a carga e pais aki pa hibe dilanti. Personahenan cu a marca historia di nos pais ta vincula den hopi di nos di un forma of otro”.

Prome Minister Eman a bisa cu ora nos mira bek dificilmente nos por t’e huesnan di e historia cu a wordo marca.

“Nos como e generacion cu ta sigui tin e responsabilidad pa transmiti n’e comunidad un sentido di orguyo di esnan cu a carga e pais aki. Esnan cu a haci posibel cu nos por papia awe di un pais Aruba”.

Eman, kende tambe a perde su tata na un edad masha hoben, a referi durante su discurso un rato na Shon A Eman. Ora cu el a fayece despues di un bida di lucha y dedicacion sirbiendo su pais cu tur su energia y mester a wordo hiba na su ultimo lugar di sosiego dor cu e mes no por a haci esaki mas, esaki a wordo haci dor di su amigonan y esnan cu el a inspira.

Difunto Betico Croes tabata un di esnan cu a cargu’e pa su lugar di descanso. Esaki ta un mensahe di un lucha, un causa cu ta pasa di un generacion pa otro.

“Nos mester ta orguyoso cu den cada epoca dificil di nos pais nos tabatin lidernan cu a carga e honor di e pais aki den e plataformanan mas halto di mundo”.

“Laga e inspiracion aki cu lidernan a traspasa di generacion pa generacion, e amor cu nos tin pa nos pais sirbi como inspiracion pa trece nos comunidad hunto pa celebra nan memoria, pa kere den nan causa, pa cana riba e mesun trayectonan cu nan a inspira nos pa cana”, Prome Minister Mike Eman a finalisa su discurso. Despues el a bay saluda e 2 yiu muhernan di difunto Betico Croes, y claramente por a mira cu e actual lider di MEP, Evelyn Wever-Croes a evita di saluda Prome Minister Mike Eman. Despues a sigui e anochi cultural.